

Visoki predstavnik obilježio Međunarodni dan žena

Visoki predstavnik, Wolfgang Petritsch, posjetio je danas radionicu pod imenom "Žene za žene" u Sarajevu kako bi obilježio Međunarodni dan žena – 8. mart. "Žene za žene International" je domaća nevladina organizacija koja osigurava stručnu obuku i mikro-kredite kako bi se pomoglo ženama da pokrenu svoj vlastiti posao. Do sada je organizacija "Žene za žene" dala podršku, finansirala ili osigurala obuku hiljadama žena Bosne i Hercegovine.

Visoki predstavnik je tokom svoje posjete radionici "Žene za žene" sa zabrinutošću govorio o sve većem broju izvještaja o nasilju unutar porodice u BiH koje je u velikoj većini slučajeva usmjerenog prema ženama i djeci. Visoki predstavnik je rekao da je ovaj problem nepodnošljiv dio života koji se mora riješiti. Visoki predstavnik je također rekao da je rat učinio da mnoge žene ostanu same, te da se iste sada teško bore da sastave kraj s krajem. Nažalost, BiH se još uvijek suočava i sa problemima trgovine ženama i prisilne prostitucije. OHR sarađuje sa mnoštvom nevladinih organizacija i agencija za jednakost spolova entitetskih vlada kako bi osigurao da se riješi pitanje diskriminacije na osnovu spola osobe, te da se spriječi nasilje u porodici.

Visoki predstavnik je ohrabren činjenicom da organi vlasti BiH zauzimaju pozitivan stav kada je u pitanju jednakost spolova, što je utjelovljeno u Ustavu BiH i što predstavlja uslov za prijem BiH u Vijeće Evrope. Vijeće ministara je prošlog mjeseca usvojilo državni Zakon o jednakosti spolova, koji se sada nalazi u parlamentarnoj proceduri. Ovim zakonom se način osigurava jednakost muškaraca i žena u svim sferama života, uključujući obrazovanje, zapošljavanje, socijalnu zaštitu, zdravstvenu zaštitu te učešće u javnom životu. Ovaj zakon predstavlja veliki korak naprijed i bit će prvi zakon takve vrste koji se ikada primjenjivao u BiH.

Visoki predstavnik je ohrabrio žene da preuzmu vodeću ulogu u budućnosti BiH te obećao da će OHR pružiti podršku njihovim naporima. Visoki predstavnik još jednom ponavlja da se OHR predano zalaže za jednakost spolova kao i za društvo izgrađeno na principima nediskriminacije. U tom smislu treba se naglasiti značaj civilnog društva te uloga nevladinih organizacija.

Visoki predstavnik je naglasio činjenicu da Međunarodni dan žena ne bi trebao biti prilika koja se dešava jednom godišnje i kojom se promovira jednakost spolova, već preciznije rečeno, podsjetnik da pravo građana da ne budu izloženi diskriminaciji bilo koje vrste, uključujući diskriminaciju na osnovu njihovog spola, predstavlja temeljno ljudsko pravo koje mora biti dio modernog društvenog tkiva BiH.